

Boekbesprekings / Book Reviews

Deist, Ferdinand 1994 — Hemelpastei en navolging

Lux Verbi. 92 bladsye. Prys: R36,50.

Resensent: Dr F J Boshoff

Die kleurvolle voorblad en die ongewone formaat van die boekie dwing 'n mens om te wil kyk wat hier geskryf staan.

Deist verduidelik self in die voorwoord dat dit 'n bundel is met sewentien preke 'wat in verskillende gemeentes voorgedra is' (voorwoord).

Die preke kom uit beide Ou en Nuwe Testament. Bekende gedeeltes sowel as redelike onbekende gedeeltes kom aan die orde.

Die aanbieding is bondig en gemaklik. Die leser word telkens geprikkel om verder te lees. Die trant is persoonlik en informeel.

Deist kry dit reg om moeilike teologiese waarhede op 'n eenvoudige wyse te verduidelik wat vir die leser 'n nuwe wêreld van verstaan oopmaak. 'n Voorbeeld hiervan is: '... net God kan in Homself bestaan. Mense het verhoudings nodig as hulle werklik wil lewe, verhoudings met God, met mekaar, met diere en met die plante' (bl 5).

Deist spreek in hierdie boeke 'n baie algemene dwaling aan. Hy vertaal die geïkoneerde 'pie in the sky' met 'n stukkie goedkoop hemelpastei'. Hy waarsku dat hierdie dwaling die ruimte van God se genade verander in 'n luilekkerland waar ons hande gevou kan sit en wag dat God alles regmaak wat ons verbrou het (voorwoord).

Deurlopend keer Deist na hierdie tema terug, terwyl hy beklemtoon dat die evangelie van die gelowige, harde werk vereis, voortdurende gebed en 'n volgehoue geloofslewe.

In sy toepassing verwys Deist telkens na die omstandighede in die Republiek van Suid-Afrika. Dit is ook goed om te weet dat die boek geskryf is ná die groot verandering van 27 April 1994. Deist spreek die gelowige kerkmense aan en probeer so prakties moontlik raad gee. Van die verskillende aktuele onderwerpe wat ter sprake kom, is onder andere: wat staan die gelowiges te doen as die voorspoed verdwyn (bl 6-11); God toor nie, maar werk deur doodgewone mense en doodgewone gebeure (bl 18-22); God bly altyd teenwoordig. God is nooit weg nie (bl 75-79).

Hoewel vermoed kan word wat die bedoeling is, is sommige van die formulerings enigsins kras. Voorbeelde is: Die doel van God se genade ... was dat die wêreld óm ons deur ons optrede 'n genadige wêreld sou word Dat die aarde al hoe meer na die hemel sou lyk (bl 42); Dit is per slot van rekening waarvoor die kerk van Christus daar is: Om God sigbaar te maak in die wêreld (bl 50);

Is jy bereid dat God jou woon- en werkplek in Suid-Afrika 'n stukkie hemel maak deurdat Christus se beeld in jou gestalte kry en dat God só sigbaar word vir die mense óm jou? (bl 82).

Deist slaag daarin om dwarsdeur by die tema te bly en bou op tot die uiteindelige slot: 'Die Christelike evangelie is harde werk. Dit verg dat ek en jy geheel van harte nuwe mense moet word, ware en sigbare navolgers van Jesus Christus' (bl 92).

Hemelpastei en navolging is nuttig en van groot waarde vir gelowiges wat met hierdie probleem worstel; wat dalk al ontugter is, sowel as vir predikante wat hieroor moet preek.